



官板

詩集傳名物鈔

四

E 12
772
4



詩集傳名物鈔卷第四

東陽許公謙

秦一之十一

變九

傳○鄭譜及疏秦者隴西谷名漢地理志隴西秦亭秦谷是也鳥鼠與秦谷俱在隴西故云近爾雅鳥鼠同穴其鳥為鶡其鼠為鼯鶡大吾反鼯徒忽反○伯翳佐禹治水土舜命作虞官掌上下草木鳥獸賜姓曰嬴秦本紀秦之先帝顓頊之苗裔孫曰女修生大業大業生大費是為伯翳地理志秦之先曰伯益又云嬴伯益之後則伯翳伯益聲轉字異猶一人也○大費生大廉



玄孫曰孟戲中衍為殷太戊御後世遂為諸侯
其玄孫曰中湏保西垂生蜚廉子惡來革子女
防子旁臯子大几子大駱生成及非子成為大
駱後周孝王封非子為附庸邑之秦子秦侯立
卒子公伯立卒子秦仲立厲王無道西戎反王
室滅大駱族宣王以仲為大夫誅西戎死之王
立其子莊公為西垂大夫居犬丘卒子襄公立
西戎與申侯弑幽王襄公將兵救周送平王徙
雒邑王封為諸侯於是始國與諸侯通使遂有
岐豐之地卒子文公立卒孫寧公立卒三父廢
太子武公而立其弟出子後三父復殺出子而

立武公卒弟德公立初居雍城中音仲湏古穴

反

以上並譜及疏

○汧輕煙反地理志汧水出扶風汧縣

西北入渭○疏初洛邑與宗周通封畿東西長

南北短相覆為千里本紀賜襄公岐以西地文

公以岐東獻之周鄭言得八百里地是全得西

畿春秋之時秦境東至河本紀之言不可信○

雍今扶風雍縣○地理攷異犬丘在汧渭之間

即槐里是也

以上並疏

車鄰

秦

國人誇美秦君

經○一章寺釋文如字又音恃○二章毛氏陂者

曰坂下濕曰隰陂音坡○詩緝地里志隴西郡

有隴坻師古云隴坻謂隴阪即今之隴山此郡在隴之西故曰隴西三秦記其阪九回不知高幾許欲上者七日乃越高處東望秦川然則阪固秦地所有也坻丁計反又音底○詩紀既見君子並坐鼓瑟簡易相親之俗也今者不樂逝者其耄悲壯感嘆之氣也秦之強以此而止於為秦者亦以此○吳正傳逝者謂自此以往○三章爾雅楊蒲柳注左傳所謂董澤之蒲疏生澤中可為箭筈埤雅楊有黃白青赤四種白楊葉圓青楊葉長赤楊霜降則葉赤材理亦赤黃楊性堅緻難長筈古旱谷我二反緻直利反難

長之長知丈反

並坐鼓瑟鼓簧君臣之際禮儀等威猶未能辨蓋其習於夷狄之常也故見寺人之令則驚異而誇之矣然告其君者則止曰不樂則耄而止耳有盈滿之心無警戒之意作詩者未為知義之君子也其流風日甚至於始皇窮奢極欲宮觀相屬鍾鼓充之其漸蓋始於此而其尊君卑臣亢抑太甚遂使上下之情不通而致敗則又等威無辨之弊而力反之以至於甚也秦之亡未必盡因車鄰之一詩然君子立言不可不審也

傳○一章詩緝鄰鄰密比之意言車之衆○疏天
官內小臣與寺人別官言寺人內小臣者謂寺
人是在內細小之臣非謂寺人即是內小臣之
官也燕禮諸侯之禮也云獻左右正與內小臣
是諸侯有內小臣也左傳齊寺人貂晉寺人披
是諸侯有寺人也○二章疏易注耄年踰七十
左傳注七十曰耄愚謂自七十至八十皆可言
耄

駟驥秦國人美秦君

經○一章驥釋文又吐結及

此但以君所乘車而言四馬一色君車之選

也媚子公之御者也六轡在手在其手也公
曰左之命此人也舍拔則獲君射之善又以
見御之良也詠其辭意則車馬侍從之盛不
言而可見矣

傳○一章缺與饁同古穴反見小戎傳○二章毛
氏冬獻狼夏獻麋春秋獻鹿豕羣獸疏田獵是
虞人所掌獸人所獻之獸以供膳毛引獸人以
證之也愚案疏言如此故傳以之類兩字例之
而不仍毛質言之也又案天官獸人春秋獻獸
物今毛云鹿豕羣獸不知何據周禮注疏狼膏
聚聚則温故冬獻麋膏散散則涼故夏獻春秋

寒温適凡獸皆可獻也及狐狸○射獸射必之射皆食亦反中陟仲及○六御當為五御逐禽詳見小雅車攻○為去聲

小戎秦婦人誇西征車甲之盛及思其良人

經○卒章鏤音漏

傳○一章疏考工記國馬之輅深四尺有七寸注馬高八尺兵車乘車輅崇三尺有三寸加軫與鞮七寸又并此輅深則衡高八尺七寸除馬之高餘七寸為衡頸之間是輅在衡上故頸間七寸也愚案考工記又曰六尺有六寸之輪輅崇三尺有三寸也加軫與鞮馬四尺也注疏此車

之高者也輅是軸頭處輪之中央鞮伏兔也蓋四馬車一轅車軸上有伏兔尾後上載車軫軫始有車輿則軸去地三尺三寸上又兼伏兔及軫并七寸車輿去地總四尺也詩記輅前駕於服馬之衡上其後則乘前軫直逼後軫也鞮音卜○左氏傳定九年齊伐晉夷儀王猛曰我先登東郭書斂甲曰曩者之難今又難焉猛曰吾從子如驂之靳疏靳當胃之皮驂馬之首當服馬之胃胃上有靳釋文本或作有靳者非靳居覲反○詩緝陰以板橫側置車之前及左右三面○金銀銅鐵鉛總謂之金謂消白金未必皆

白銀也○疏左傳哀二年郵無恤曰兩鞞將絕
吾能止之駕而乘材兩靳皆絕是橫軌之前別
有驂馬一鞞也○輻音福○疏色青黑名綦馬
名為騏知其色作綦文○二章疏盾以木為之
○三章鞞與閉同疏儀禮既反記說明器之弓
云有鞞今案禮本作秘蓋與鞞通

蒹葭

秦四

不知所指

異

經○詩記此詩全篇皆比所謂伊人猶曰所謂此
理也○三章毛氏涖厓也

蒹葭蒼蒼而白露為霜矣人無百年而良時
已邁矣所謂伊人惟在水一方爾所謂至道

豈遠吾身哉但遡迴從之則道阻而且長用
私智求之則理鑿而且迂獨遡游從之則宛
在水中央也惟以樂易公平之心求之則無
所往而非道也人其可不思日月之易邁而
迪知大道以至其極乎此或非詩人之本意
亦學者之一義也

傳○一章詩緝小者曰蒹中者曰萑大者曰葭三
物共十一名蒹水草一名蒹荻似萑而細高數
尺牛食之令肥彊又曰今人以為簾箔因此得
名是蒹蘆荻一物而三名也初生為莢長大為
蘆成則名萑又名為離是一物而四名也初生

為葭長大為蘆成則名葦又名華亦一物而四名也郭璞云莢似葦而小又云蒹似萑而細是蒹小於萑而萑小於葦也韻會莢中赤始生末黑黑已而赤故謂之莢其根旁行牽揉繫互其行無辨而又彊故又謂之亂江東呼為烏蔞至秋堅成謂之萑其初生三月中其心挺出本大如箸上鋸而細揚州人謂之馬尾葭蘆皆葦之未秀者葦則大葭也其華遇風則吹揚如雪聚地如絮萑音完蒹音廉莢吐敢反亂五患反蔞音丘○二章爾雅小渚曰汜小汜曰坻○三章直音值

終南

秦

國人美其君

經○一章梅見召南標有梅

傳○一章李氏終南西距鳳翔武功北距萬年長

安○毛氏錦衣采色也狐裘朝廷之服䟽錦者

雜綵為文故云綵衣白狐皮為裘其上加錦衣

為裼又加皮弁服也玉藻注君衣狐白毛之裘

則以素錦為衣覆之使可裼也袒而有衣曰裼

必覆之者裘褻也凡裼衣上衣象裘色裘是狐

白則上服亦白皮弁服以白布為之衣之白者

唯皮弁服耳玉藻又云錦衣狐裘諸侯之服也

謂在天子之朝服此耳受天子之賜歸則服之

以告廟於後不服其視朝受聘則服麇裘也○
箋渥丹言赤而澤也○漬疾賜反○二章䟽黻
在裳言黻衣者衣大名與繡裳異其文耳○刺
七亦反

黃鳥秦哀三良

經○左氏傳釋文車音居鉞其廉反○惴之瑞反
○地理攷異括地志秦穆公冢在岐州雍縣東
南二里三良冢在雍縣一里故城內今鳳翔府
大興縣也

傳○一章貿音茂殉辭順反穆公卒以三良殉事
見左氏傳文六年○題下以遺之遺于醉反從

死之從才用反與羊茹反

晨風秦婦人念其君子異

經○二章櫟見唐鵠羽苞相注

傳○一章䟽鷗似鷓青黃色燕頷勾喙嚮風搖翅
乃因風飛急疾擊鳩鴿燕雀食之鷗張連反勾
音鈎鴿音閣○屨以冉反屨弋支反戶扃也風
俗通百里奚為秦相所賃澣婦自陳能歌呼之
援琴撫弦而歌曰百里奚五羊皮始別時烹伏
雌炊屨屨今富貴忘我為問之乃其妻也伏扶
富反○二章䟽駮獸名似馬白身黑尾此駮木
名梓榆也樹皮青白駮犖遙視似駮馬崔豹古

今注山中有木葉似豫章皮多癩駁名六駁○
三章疏木有唐棣常棣傳必以為唐棣未詳聞
也赤羅今楊椹又名山梨鹿梨鼠黎實亦有大
如黎之美者○酢七故反

無衣秦人樂攻戰異

經○此蓋天子命襄公討西戎時詩王于興師一
語可見

先王之制民居於近郊者五家為比五比為
閭四閭為族五族為黨五黨為州五州為鄉
居遠郊者則有鄰里鄼鄙縣遂而家之數如
鄉之數使之相保相受救其凶災而賙其不

育足其在野則八家同井使之友助扶持有事
則會萬民為卒伍而用之平居暇日情意之
鬯乎恩愛之接固已彼此交得懽心一旦同在
戰陣晝識面貌夜記聲音而左提右挈協心
力戰可以揚威而制勝不幸而敗亦爭相為
死此王者之兵所以無敵也秦舊周也先王
遺化猶有存者其曰豈曰無衣與子同袍者
相賙之意也修我戈矛與子同仇者相死之
心也但秦不善用之一導之以武事而不知
以禮故敦厚之風化為剛暴之氣而遂至於
不可禁也此詩之作君子知其有漸矣鄼子

管反調音周○西戎乃秦人不共戴天之讎而又有王命興師是以同心疾之謳吟思闕雖其風俗所致然以義動者人樂為之死亦必然之理也

傳○一章疏玉藻纁為襜緼為袍注緼謂今纁及舊絮然則純著新絲為襜雜用舊絮為袍其制度則一故云袍襜也襜古典反緼於粉反○詩記曲禮疏戈鉤子戟也如戟而橫安刃但頭不嚮戟上為鉤也直刃長八寸橫刃長六寸刃下接柄處長四寸並廣二寸周禮冬官戈秘六尺有六寸注云秘猶柄也子居列反秘音祕○疏

考工記酋矛常有四尺注八尺曰尋倍尋曰常常有四尺是二丈也夷矛則三尋長二丈四尺○二章澤即禪蓋古字通也說文禪絺也絺即袴○題下招音喬舉也朝音潮易以豉反

渭陽秦康公送舅

傳○一章疏雍在渭南水北曰陽晉在秦東行必渡渭郡縣志京兆府咸陽縣本秦舊縣渭水南去縣三里秦咸陽在今縣東二十二里○周禮巾車金路以封同姓象路以封異姓革路以封四衛木路以封蕃國皆諸侯也故人君之車曰路車○二章疏瓊者玉之美名非玉名也瑰是

美石之名瓊毛氏韻赤玉○題下左氏傳及史
 記晉獻公侂諸娶于賈無子賈姬 姓國烝於齊姜武公
 妾生秦穆夫人太子申生又娶大戎狐姬生重
 耳大戎唐叔子孫 別在戎狄者小戎子生夷吾允姓之戎 子女也伐驪戎
 驪戎男女以驪姬姬姓 男爵生奚齊其娣生卓子驪
 姬嬖欲立其子十一年諧使太子居曲沃重耳
 居蒲城夷吾居屈羣公子皆鄙二十一年驪姬
 使太子祭齊姜歸胙于公姬毒而獻之太子縊
 重耳夷吾皆出奔獻公使荀息傅奚齊二十六
 年獻公卒奚齊立大夫里克殺之荀息立卓子
 里克又殺之齊桓公秦穆公納夷吾是為惠公

元年殺里克許賂秦伯而不與六年秦伐晉獲
 晉君既而歸之八年太子圉質於秦十三年逃
 歸十四年惠公卒子懷公圍立初重耳之出也
 至狄又過衛齊曹宋鄭楚楚送諸秦秦伯納女
 五人懷公立之明年秦伯納重耳是為文公侂
 音畧重平聲女以之女去聲子金子申生既是
 世子則齊姜當是元妃左氏所載或失其實○
 左氏傳文六年晉襄公卒靈公少晉人以難故
 欲立長君公子雍仕秦襄公 庶弟趙孟使先蔑逆之
 趙孟七年秦康公送公子雍於晉穆嬴日抱太
 子啼於朝穆嬴襄公夫人太 子夷皋即靈公宣子患穆嬴宣子即 趙孟乃背

先蔑立靈公以禦秦師敗之于令狐八年秦人伐晉取武城以報令狐之役十年春晉伐秦取少梁夏秦伐晉取北徵十二年秦伐晉取羈馬晉人禦之秦師夜遁宣元年晉侵崇秦與國二年秦伐晉圍焦皆因令狐之役而相侵伐之不已也今音零

權輿秦君待賢者有始無終

傳○一章詩緝造衡自權始造車自輿始○二章疏簋是瓦器亦以木為之圓曰簋內方外圓也以盛黍稷方曰簠內圓外方也以貯稻粱皆容一斗二升公食大夫禮是國君與聘客禮食故

宰夫設黍稷六簋今惟四簋蓋謂之每食則燕食耳非禮食也○題下耆與嗜同為去聲鉗巨廉反強上聲

秦詩譜

愚案秦仲立為附庸之君十八年宣王命為大夫二十三年死於戎子莊公立襄公追稱公四十四年卒子襄公立七年救周有功為諸侯於是始國與諸侯通使十二年卒子文公立五十年卒孫寧公立十二年卒三父立少子出子六年三父弑之而立寧公之太子武公二十年卒弟德公立二年卒子宣公立十二年

卒弟成公立四年卒弟穆公任好立三十九年卒子康公瑩立十二年卒十二君二百三十六年詩十篇可譜者七篇權輿恐康公以後詩也

車鄰

駟驘

小戎

終南

無衣

右襄五詩車鄰序以為秦仲愚竊謂秦仲固嘗為附庸之君以西戎滅大駱之族宣王命為大夫蓋日與戎戰六年而死非可樂時也詩語不類然則車鄰實襄公詩爾

渭陽

右穆一詩康公為太子時作正穆世也

黃鳥

右康一詩三良殉穆則詩作於康世

陳一之十二

變

傳○外方見王風孟諸前編在應天府虞城縣西北○虞闕父至封陳見左氏傳襄二十五年○闕於葛反父匪武反大音秦妻七計反○樂記武王封黃帝之後於薊封帝堯之後於祝史記封黃帝之後於祝帝堯之後於薊通鑑外紀從樂記蘇子由古史及皇王大紀鄭漁仲通志諸

書多從史記薊音計○疏恪者敬也王者敬先
代封其後三恪尊於諸侯卑於二王之後○好
呼報反樂魚教反覲胡狄反男曰覲女曰巫

宛丘陳刺歌舞無度

傳○一章思息字反樂音洛○二章疏吳揚人謂
之白鷺齊魯謂之春鉏頭上長毛長尺餘毳毳
然與眾毛異好欲取魚時則弭之楚威王時有
朱鷺合沓飛翔而來舞然赤者少此所持其白
羽也毳蘇含反○詩記冬夏祁寒大暑之時也
人之好樂於是時必少息焉今也無冬無夏則
它時可知矣○三章疏離九三鼓缶而歌則是

樂器坎六四樽酒簋貳用缶注云大臣以王命
出會諸侯主國尊於簋副設玄酒以缶則又是
酒器左傳襄九年宋災具綆缶則又是汲水之
器然則缶可以節樂若今擊甌又可以盛水盛
酒即今之瓦盆也

東門之枌陳男女相樂

經○一章相見唐鵠羽

傳○一章枌見唐山有樞○著陟略及○疏婆娑
盤辟舞詩記婆娑不必是舞但徘徊翱翔之義
○二章疏善旦謂無陰雲風雨○三章芘芣音
毗浮䟽一曰芘芣小草多華少葉葉又翹起似

蕪菁華紫綠色可食微苦○遺去聲

衡門陳三隱居自樂且異

經○二章魴見周南汝墳○三章本草鯉魚脊中

鱗一道數至尾無大小並三十六鱗有赤鯉白

鯉黃鯉三種

東門前一章有自足之意後兩章無外慕之心此

雖賦體而實似比也

傳○一章考工記門阿注棟也疏屋脊○爾雅門

側之傍堂謂之塾注夾門堂顧命疏塾門內北

面○考工記門堂注門側之堂引爾雅門側之

堂謂之塾則堂即塾也今又案屋之基亦曰堂

大誥弗肯堂注不肯為堂基如周禮堂崇三尺

堂崇一筵禮記天子之堂九尺史記坐不垂堂

皆指堂基而言也今傳上既有塾字則堂字作

基說為長○說文字屋邊即屋四垂也

衡門之詩隱士所作阿塾堂字傳因疏文之

舊亦大約言門之深者有是名也命士之堂

三尺庶人蓋無級門之制豈復若是巍巍哉

然則衡門固隱士之常爾

泌泉水也毛傳文疏邛有泌彼泉水知泌為泉

詩緝泌彼泉水乃泌然流出貌毛以此泌與彼

泌字異義同亦當為泉水之流貌非謂泌為泉

水也

東門之池陳四男女會遇 異

傳○一章漬疾賜反○晤毛氏遇也箋猶對也○

解下介反○三章韌而振反疏管似茅而滑澤

無毛根下五寸中有白粉者柔韌宜為索漚乃

尤善

東門之楊陳五男女期會不至 異

傳○一章啓明見小雅大東傳○二章肺釋文普

貝蒲貝二反

墓門陳六刺無良 異

經○二章鴉于驕反

傳○二章疏鴉一名鵬與梟一名鴟陸璣云大如

斑鳩綠色惡聲之鳥也入人家凶賈誼所賦鵬

鳥是也其肉甚美可為羹臠又可為炙詩緝鴉

怪鴟也鵬也鴟鵂也即瞻印之為梟為鴟也或

曰鵬似鴉則鴉又非鵬矣梟古么反臠音壑鴟

音休留

序○春秋桓六年秋八月蔡人殺陳佗左氏傳陳

侯鮑卒文公子佗殺太子免而代之蔡人殺五

父而立厲公五父陳佗也免音問父音甫

防有鵲巢陳七男女有私憂閒 異

傳○一章疏茗饒也幽州謂之翹饒蔓生○廷居

望反間居諫反

甄也瓠音零甌如

月出陳男女相悅而相

經○詩緝皎月光依

明豔白晳如月之

也皎若明月舒其

物慘言不舒而

言歟

株林陳刺靈公淫夏

傳○一章寰宇記

亭城城北五里

陳之株邑故柘

舒字子南以字

公名平國共公

十四年公與其

衷其袒服以戲

效焉公告二子

十五年公與二

汝對曰亦似君

二子奔楚徵舒

殺徵舒立靈公

栗反婦人近身

澤陂陳男女相念

經○輾轉見周南關雎傳

二月出男子思婦人也澤陂婦人思男子也

傳○陳國下錯七故反重平聲復方六反

陳詩譜

陳詩十篇惟知株林為靈公之詩餘不知何

世靈公者胡公之十八世也靈公十五年弒

當周定王之八年魯宣公之十年

檜一之十三變

傳○左氏傳顓頊氏有子曰犁為祝融楚語顓頊

命南正重司天以屬神火正黎司地以屬民火

為北史記楚世家帝顓頊高陽生稱稱生卷章世本

名老童卷章生重黎重黎二人司馬誤合為帝嚳高辛火正甚

有功能光融天下帝嚳命曰祝融祝大融明也共工氏

作亂帝使祝融誅之而不盡帝乃誅重黎而以

其弟吳回居火正為祝融吳回亦卷章生吳回生陸終陸

終子六人其四曰會人詩疏此即檜之祖也姁

姓檜本祝融所封之墟唯姁姓之後處其地姁

音云稱尺證反○外方見王風○前編滎波孔

氏以為一水周禮職方其川滎雒其浸波澆則

二水也沛水入河而南出溢為滎今鄭州滎澤

是其處爾雅水出自洛為波而山海經曰婁涿

之山波水出其陰北流注于穀二說未知孰是
 西漢末沛水不復南溢而滎涸滎音滎滎音詐
 沛子禮反○家說公羊傳桓十一年古者鄭國
 處于晉先鄭伯有善於鄆公者通乎夫人乃取
 其國而遷鄭焉鄭語桓公光寄帑於虢鄆周語
 鄆由叔妘注鄭武公滅之則通乎叔妘者武公
 也○鄆滅又見鄭譜○為于偽反
 愚案檜風急迫褊陋鄭風放蕩淫邪蘇氏之
 說恐未然也以詩之次言之魏列晉前其意
 似邶鄘之於衛鄭檜相去遠恐亦不得為此
 例

羔裘檜國君好潔衣服遊宴不彊政治

經

羔裘狐裘國君所得服非奢也然羔裘以視
 朝可也而以逍遙朝朝狐裘朝天子可也而
 以自朝其羣臣則固已失禮之正矣而又不
 能彊於政治惟服其服尸其位而已觀如膏
 有曜之言則實有好潔衣服之僻大夫見其
 暗弱必又諫而不從故曰我豈不於是而思
 之然知其終不可格君之心惟心勞而憂忉
 忉耳久則憂而至於傷又久則不可形之於
 言惟中心自傷悼耳

傳○一章詩緝狐裘有白有青有黃玉藻云君衣狐白裘錦衣以裼之此狐白裘也又云君子狐青裘豹褱玄綃衣以裼之此狐青裘也又云狐裘黃衣以裼之此狐黃裘也鄭氏以狐白之上加皮弁服天子以日視朝侯在天子之朝亦服之以黃衣狐裘為大蜡之後作息民之祭則服之郊特牲云黃衣黃冠而祭息田夫也引此為證以狐青為臣下之服諸侯不服之玉藻稱君子狐青裘注以君子為大夫士也此詩狐裘不言其色鄭氏以為黃衣狐裘謂檜君以祭服而朝也蘇氏以為狐白謂檜君以朝天子之服而

聽其國之朝也二說不同狐青為臣下之服非檜君所服檜君好潔其衣服亦必不服狐黃當從蘇氏以為狐白○卒章漬疾賜反
素冠檜思見三年之喪
經
舉世不能行三年之喪有人獨能行之君子以絕無而僅見故悲且喜而作此詩也一章三句皆言服喪之人謂今我庶幾見此服素冠者蓋不特衣冠之合度抑且急於哀戚而顏容瘦瘠其心哀苦而憂勞二三章首句復言其服下二句則君子之自言也心傷悲心

蘊結悲其盡哀也與同歸與如一喜其盡禮也上言勞心下言我心故所指有彼此之異傳○一章縞古老反紕並移反則冠之冠去聲○禫徒感反除服祭名儀禮中月而禫注中猶間也與大祥間一月自喪至此凡二十七月禫之言澹澹然平安意疏二十七月禫徒月樂二十八月復平常正作樂也間間廁之間去聲○三章鞞見曹侯人○鞞分物反○題下疏肖似也不有所似謂愚人也檀弓云子夏既除喪而見夫子予之琴和之而不和彈之而不成聲作而曰哀未忘也先王制禮而弗敢過也子張既除

喪而見予之琴和之而和彈之而成聲作而曰先王制禮不敢不至焉彼說子夏之行與此正反必有一誤或當父母異時也毛公當有所據今案劉向說苑亦載此事與毛傳同但以子路為子貢然夫子之於門人未有稱其字者恐毛公所傳或誤爾○為于偽反衰倉回反見賢遍反援于元反衍苦旦反夫三之夫音扶隰有萋楚三檜民苦政賦不如草木三異傳○一章疏爾雅萋楚一名鈹弋本草一名羊桃陸璣葉長而狹華紫赤色其枝莖弱過一尺引蔓于草上鈹音遙○少詩照反○二章累良偽

反

匪風四檜賢人嘆周室衰

傳○二章飄符遙反類隔切今易並遙反釋文又

必遙反○疏迴風旋風也○三章說文驚大金

一曰鼎大上小下若甑曰驚

曹一之十四變十

傳○鄭譜曹在濟陰定陶夾於魯衛之間疏曹都

在濟陰其地則踰濟北魯在其東南衛在其西

北○前編陶丘在今曹州定陶縣雷夏今濮州

雷澤縣西北雷夏陂東西二十里南北十五里

計古雷澤必大於今荷澤在今曹州濟陰縣南

三里

蜉蝣曹一刺見近忘遠

經○子金子君子念夫人雖不知久遠之計而亦

知所以自修故心之憂之而欲其以我為歸也

蓋君子之於人無不欲其入於善苟有一毫自

治之心固君子之所欲進之也

傳○一章疏蜉蝣聚生糞土中似甲蟲有角大如

指長三四寸甲下有翅能飛夏月陰雨時地中

出豬好噉之蝓去吉反蝓去王反○爾雅注身

刻入狹而長有角傳當加有字○三章掘閱疏此蟲

土裏化生言其掘地而出形容鮮閱也閱者悅

憚之意朱子不取詩緝更閱謂升騰變化也

候人曹刺君近小人

經○一章戈見秦無衣

傳○一章疏夏官候人上士六人下士十有二人
史六人徒百有二十人則諸侯候人亦應是士
而徒數必少其職各掌其方之道治與其禁令
以設候人注禁令備姦寇也設候人者選士卒
以為之有四方來者則致之于朝歸則送之于
竟荷戈兵防衛姦寇○爰見衛伯兮○疏玉藻
鞞之制下廣二尺上廣一尺長三尺其頸五寸
肩革帶博二寸祭服謂之芾它服謂之鞞緼赤

黃之間色所謂鞞也珩佩玉之珩黑謂之黝青
謂之葱周禮公侯伯之卿三命下大夫再命上
士一命曹為伯爵大夫再命是大夫以上皆服
赤芾於法又得乘軒故連言之軒大夫之車也
緼音溫鞞音妹黝於九反○晉文公入曹事在
左氏傳僖二十八年 僖負羈曹賢大夫○二
章鵠音烏一作洿疏今鵠鵠也好羣飛入水食
魚形似鶚而極大喙長尺餘直而廣口中正赤
頷下胡大如數升囊若小澤中有魚便羣共杼
水滿其胡而棄之今水竭乃共食魚鵠音胡杼
丈呂反○詩緝鵠鵠當入水中食魚今乃在魚

梁之上竊人之魚以食未嘗濡濕其翼如小人
居高位竊祿不稱其服也○三章稱尺證反

鳴鳩曹美君子用心均一異

傳○一章秭夏吉二音鞠音菊爾雅作鵠鳩又名
獲穀陸璣又名擊穀又名桑鳩或謂之肩題齊
人名擊正案戴勝自生穴中不巢生而方言云
戴勝非詩緝凡十一名○子金子如結言心不
放○二章疏玉藻雜帶君朱綵大夫玄華士緇
辟是有雜色飾焉弁類多矣韋弁以即戎冠弁
以從禽弁經以弔凶不得與絲帶相配唯皮弁
是視朝常服

下泉曹思治

經○詩記匪風下泉雖皆思周道之詩然匪風作
於東遷之前此一時也下泉作於齊桓之後又
一時也

泉固以潤物也然必於春夏之時乃能發生
至於寒則不適於用而徒以浸彼稂蕭著草
而又傷之耳於以見王澤不下流而所被之
政非澤也所以寤而即嘆以念先王之治寤
嘆則見其憂思之極嘆之不已惟寐則已爾
卒章則先王之政也

傳○卒章左氏傳注解縣西北有郇城服虔曰郇

國在解縣東○題下復扶又反間居莧反治去聲

曹詩譜

曹叔振鐸至共公十五世而有候人詩其言與左氏傳合餘三詩莫知其世

幽一之十五變十

詩記幽居風雅之間何也風之所為終而雅之所為始也變風終於曹思明王賢伯之不可得於是次之以幽反之於周公而後至於鹿鳴言周之所以盛者由周公也○周世次見周南○下泉金子公劉之遷幽也史謂周道之興自此則

國語所謂十五王而文始平之者自公劉數之爾不然則以有德之宗數之猶殷言賢聖之君六七漢言七制之主也讀篤公劉之雅可想見公劉度地建國和輯人民之規焉讀七月之詩可想見幽民因天力本孝慈忠愛之俗焉漢儒舊序以篤公劉為召康公之所獻以幽七月為周公之所陳意者幽之遺詩歟召公獻之以備燕享之樂使成王知立國勤勞之故周公陳之以為矇工之誦使成王知故國衣食之原故篤公劉列於雅而幽七月自為風蓋自三聖相授其禮樂聲教之盛漸被四海后稷於此有邠家

室子孫皆有令德其後雖當夏道衰微一再轉徙而修其訓典奕世載德加以公劉之賢生聚再繁邦家再盛故國人敘其建立之規道其風土歌謠之美吹之管籥和以土鼓周人世守之以爲其先公之樂至有天下而亦專官掌之周官籥章之職掌土鼓籥是也土鼓葦籥皆堯之遺音也而籥則公劉之遺音也籥所斂之詩則豳詩豳雅豳頌也豳詩七月之詩也豳頌雖不知其的爲何詩而篤公劉之篇豈非豳雅之詩歟或者顧謂公劉之時夏道將墜國介戎狄之間計無文物篤公劉七月之詩蓋出周

召之筆追述先公之事爾是獨不思夏當三聖之後義理素明言語素雅其文章最盛但載籍失其傳耳其存者與其雜見傳記者可想見也豈至周召之時而後始有如此之文哉且周詩固有追述先公之事者然皆明著其爲後人之辭生民之詩述后稷之事也而終之曰以迄于今豳之詩述古公之事也而係之以文王之事此皆後人之作也若篤公劉之詩極道岡阜佩服物用里居之詳七月之詩上至天文氣候下至草木昆蟲其聲音名物圖畫所不能及安有去之七百歲而言情狀物如此之詳若身親見之

者又其末無一語為追述之意吾是以知其決為幽之舊詩也況史氏已明言詩人歌樂思其德乎雖然七月為幽之舊詩固也何以不居二南之前而居變風之末歟曰詩皆采之當世而前世之詩存者不可泯也故幽七月附於十五國風之後猶商那附於三頌之末也七月既非周公之所自作何以係周公諸詩曰幽周公之采邑也周公食邑於幽岐之間以其為周之舊邑故曰周公然周既為一代有天下之號則周公之詩不可謂之周而謂之幽焉幽詩既周公之所陳故凡周公之所作與為周公而作者皆

附之然則公劉為雅七月獨不可為雅歟曰風雅固各有體也音並見周南

七月幽周公陳戒成王

經○一章詩緝畝大抵以南為正故每曰南畝○五章為于偽反○六章毛氏春酒凍醪也疏凍時釀之即酒正三酒中清酒也詩記月令注古者獲稻而漬米麴至春而為酒○毛氏眉壽豪眉也疏人年老者必有豪眉秀出詩緝眉壽衰矣養氣體焉以助之也○斷絕之之義當音短○七章索素洛反○卒章冲直弓反○兕觥見周南卷耳

詩集傳名物金卷四

二十六

凡事豫則立七月之詩豫而已矣有天下國家者豫其所當豫則無有不善矣○詩中以日言者雖為建子之義其實主於陽而言然止於四之日者春日載陽春日遲遲即辰月也蠶事必在季春故也建巳為正陽之月不曰六之日而曰四月者蓋陰陽之生皆以漸夏至一陰生非生於夏至之日謂至夏至之日而成一陰也其始實自小滿之日六陽已極而微陰萌兆馴致而成故君子探其理於建巳惟以月言之也

傳○一章放甫兩反篇內同下去聲○晉天文志

東方心三星天王正位也中星曰明堂天子位前星為太子後星為庶子子金子堯典仲夏火中月令則季夏昏心中季冬曉心中故周家有火中寒暑乃退之說謂季夏火昏中暑極而退季冬火曉中寒極而退也豳公之詩上距堯未遠歲差不多故七月之昏則亦見火之西下矣○釋文耜耒下耂也廣五寸耒耜上句木也耜古以木為之易曰斲木為耜揉木為耒亦以金為之周禮注古者耜一金兩人併發之耂他丁反耒盧對反句音鉤○長知丈反○甫田箋田峻司嗇今之嗇夫也韻會詩話云周禮無田峻

之職蓋六遂中鄰里鄮鄙縣遂之長高者爲大夫卑者爲士通稱田峻蓋農田之俊也○瞽矇見綱領○周禮注疏諷誦謂闇讀之不依琴瑟而詠也○二章倉庚見周南葛覃○稗直利反○繫見召南采芣○啖音淡遠于願反○三章萑葦見秦蒹葭○䟽斨即斧也唯釜孔異耳隋狹而長也釜斧斤受柄處也隋徒禾湯果二反釜曲容反○䟽春秋伯趙氏司至伯趙賜也以夏至來冬至去陳思王惡鳥論云伯勞以五月鳴應陰氣之動陰爲殘賊蓋賊害之鳥也其聲賜賜故以其音名云詩緝月令仲夏鳴始鳴蓋

至七月則鳴之極而將去矣○毛云朱深纁也祭服玄衣纁裳○四章箋物成自秀萋始詩緝曹氏曰釋草萋繞蕪苑注云今遠志也其上謂之小草說文云劉向說萋味苦謂之苦萋本草遠志又有棘苑繞萋細草三名四月采根葉陰乾參訂諸說知萋爲遠志矣四月陽氣極於上而微陰已受胎於下萋感之而早秀案嚴粲萋毛不指爲何草鄭疑爲王萇陸璣亦無明說唯曹氏以爲遠志證據甚明萇音婦○詩緝蝟蟬也諸蟬之總名釋蟲云蝟蝟蟬郭璞引夏小正云蝟蝟者五色具蟬蝟者蝟俗呼爲胡蟬

故爾雅䟽蝟者目諸蟬也蝦音郎蟾音唐蝦音
偃○說文草木皮葉落墮地為葶○䟽于往也
于貉言往不言取狐狸言取不言往皆是往捕
之而取其皮故毛言于貉謂取狐狸皮并明取
之意也今案爾雅狸狐貍貉醜是四物同類也
又別條䟽字林云貉似狐善睡其子名貉詳此
則貉與狐狸非一物傳以為一物未詳貍音湍
貉即貉字貍音喧○五章爾雅蜚螽蚣蝮注䟽
所謂春黍也幽州謂之春箕蝗類也長而青長
角長股股鳴者也或謂似蝗而小班黑其股似
玳瑁五月中以兩股相切作聲聞數十步詩緝

舊說以為即螽斯者非蜚音斯蚣音嵩須○
䟽爾雅翰天雞謂小蟲黑身赤頭一名莎雞一
名酸雞又曰樗雞陸璣如蝗而斑色毛翅數重
其翅正赤六月中飛而振羽索索作聲幽州謂
之蒲錯今絡緯蟲是也翰音翰○李氏考工記
以股鳴者以翼鳴者以股鳴者斯螽是也以翼
鳴者莎雞是也○蟋蟀見唐蟋蟀箋在野至入
牀下皆謂蟋蟀也言三物如此者將寒有漸非
卒來也○䟽篳戶以荆竹織門以荆竹通風故
泥之○愚案穹室兩句四事皆治室之事塞向
以禦北方之寒氣瑾戶以禦南方之寒氣謂之

穹室則南牖亦或塞之矣○六章䟽鬱唐棣之類樹高五六尺實大如李正赤食之甜本草一名雀李一名車下李萼萼亦鬱類而小別晉宮閣銘云華林園中有車下李三百一十四株萼李一株車下李即鬱萼李即萼二者相類而同時熟故言鬱萼也萼於盈於耕二反○詩記葵承露也大莖小葉華紫黃色可茹公儀休所拔是也埤雅有紫白二種○小宛䟽菽大豆也采其葉以爲藿以芼牛謂以鼎煮牛取其骨體置之於俎其汁則芼之以藿調以五味乃盛之於鉶謂之鉶羹鉶音刑○釀女亮反○詩記壺枯

者可爲壺嫩者可供茹䟽甘瓠可食就蔓斷取而食之李氏壺性蔓生斬之故曰斷○荼見邶谷風○少式照反長知丈反○七章秭音夏說文禾藁去皮○稻稌也性宜水即今南方所食稻也稌音杜又音土又通都反秭音述糯也又稷之黏者苽音孤韻會雕苽也亦作雕胡即枚乘所謂安胡之飯今所食芟苗米也梁粟也○愚案麥非納於十月也此蓋總言農事畢爾○卒章左氏傳昭四年其藏冰也深山窮谷固陰沍寒於是乎取之注沍閉也必取積陰之冰所以道達其氣使不爲災道去聲○䟽沖沖非貌

非聲故云鑿冰之意○天官凌人掌冰正歲十
二月令斬冰注正謂夏正正歲季冬○禮注獻
羔祭司寒也○著直略反○左氏傳食肉之祿
冰皆與焉大夫命婦喪浴用冰又曰自命夫命
婦至於老疾無不受冰冬無愆陽至民不夭札
皆左氏傳文注食肉之祿謂在朝廷治其職事
就官食者命婦大夫妻也老致仕在家者愆過
也愆陽謂冬溫伏陰謂夏寒苦雨霖雨為人所
患苦厲惡氣也短折為夭夭死為札與音預札
側八反○變悉協反○儀禮鄉飲酒禮尊兩壺
于房戶間士冠禮注置酒曰尊今傳云兩尊壺

恐傳寫之誤○詩記豳之先公國容未備無君
臣之間故曰朋酒斯饗曰殺羔羊躋彼公堂萬
壽無疆○題下中音仲歛即吹字

鴟鴞

豳

二周公遺成王

經○前編武王崩成王立年十三周公位冢宰正
百工成王元年三叔流言於國曰公將不利於
孺子周公乃告二公曰我之弗辟我無以告我
先王於是辭位出巡狩於邊鄭康成曰周公遭
流言之難避之而居東都朱子謂弗辟之說宜
從鄭氏蓋是時三叔方流言於國周公處兄弟
骨肉之間豈應以語言之故遽興師以誅之聖

人氣象大不如此且王方疑公公固不應不請而自誅之若請之於王王亦未必見從當時事勢亦未必然也前編又曰周公居東二年則罪人斯得孔氏以居東為東征非也斯得者遲之辭也朱子曰管蔡流言成王疑之未知罪人之為誰也及周公居東二年成王悟乃知罪人在管蔡也若曰所謂罪人者今得之矣或問居東二年非東征乎朱子曰成王方疑周公周公豈得即東征乎二年猶待罪也成王三年周公為詩以貽王名之曰鴟鴞後王感風雷之變迎周公反國三監及淮夷叛周公乃作大誥東征

誅管叔殺武庚放蔡叔寧淮夷東土三年而後定○子金子七月之詩周公遭變時所陳也夫成王方有疑於周公公方避位居東而顧為是諄諄幾於強聒者嗟乎此周公忠愛之誠也夫豈以居東而遂忘其君也哉然亦惟居東故可以忠告爾向使居中秉國則成王益深不利之疑雖吐赤心其孰能信之聖人所處其脫然無累之心與其拳拳不已之心並行不悖也于後公乃為詩貽王名曰鴟鴞則鴟鴞最後作也成王之疑亦將釋矣鴟鴞之詩其情危其辭急蓋有以憂武庚之必反王室之必搖也夫昔也武

庚以周公利權間三叔而今也奄君又以周公見疑嗾武庚則躑躅之變勢所必至故周公汲汲為成王言之為鳥言以自喻或以喻先王也曰鴟鴞鴟鴞既取我子謂其已誘管蔡也毋毀我室謂其勿更搖毀王室也恩斯勤斯鬻子之閔斯傷管蔡也二章言先王創業之備固也今此下民孰敢侮予微管蔡之內叛武庚之外連則固未易侮也三章言先王之勤勞也四章言王室之孤危外患之必至其辭不得不急也既而成王悟周公歸而管蔡武庚卒於叛蓋其參謀造禍非一日矣○鴟于驕反○徹字釋文無

音韻會撤字在徹字下作敕列反者有剝訓則詩中徹彼當作敕列反

愚案傳以鴟鴞之詩為誅武庚後作益以周公居東為東征也其原皆因金縢我之弗辟之辟讀為致辟管叔之辟故其說如此亦朱子早年之說也及後與蔡仲默論書手帖則曰弗辟之說只從鄭氏為是向董叔重辨此一時信筆荅之謂當從古注說後來思之不然今書說悉已改定而詩傳乃若此者未及改也若從避音而以前說求詩則聖人之心與當時事勢之實皆可見矣然又知讀書者

於字音訓話不可不致謹也一字之誤遂至義理懸絕如此其可視為小學之事而忽之哉○此詩大意前二章主武庚而言後二章言已勤勞以告成王也首章謂武庚既誘管蔡流言而失君臣之義兄弟之親為周家之罪人所謂取我子也次章言周室經營亦已鞏固汝武庚者毋徒起覬望之心三章自言自武王以來至成王初年盡力經營之勞苦末章謂盡瘁事國乃未足以定天下室翹翹謂我家管蔡之內亂也風雨飄搖言武庚之外撓也則我其能不鳴之急與所以感悟成

王也

傳○一章鷓鴣即陳墓門之鴉也鷓鴣音休留攬俱縛反爪持也撲取也○二章繆莫侯反紐音今易莫彪反○三章䟽萑萑亂之秀穗也亂見秦蒹葭萑戶官反茗徒彫反亂魚患反○藉慈夜反○四章殺所界反

東山

三

周公勞歸士

經○三章洒所解反埽素報反

舊說周公東征誅管蔡歸而作朱子謂成王感風雷之變而迎周公於是周公東征三年矣歸作此詩子金子曰周公出避居東而歸

其民周公采邑之民東征乃東行非東伐也
若異日東征之事成王為主天子之六師設
有勞歸之詩則當為雅而不在豳風矣愚詳
味詞意恐果東伐歸後之詩其證有三東征
之役固成王親行而傳謂周公伐奄三年討
其君是周公亦行矣其期正與于今三年相
應一也誅管蔡伐奄蓋嘗有戰陣之勞矣居
東未嘗戰而此曰勿士行枚二也先儒謂三
代雖改正朔而月數未嘗易然則詩書以月
言者皆夏正之月也多方稱五月丁亥王來
自奄至于宗周古者師行日三十里則行役

歸途在三四月間也成王迎周公乃在秋熟
未穫之時詩稱十月穫稻則周公歸在九月
間也而東山草木蟲鳥皆夏月氣象三也若
成王主兵勞詩不當在豳風則當時以周公
之作倒附之七月諸詩亦未可知也況風雅
音節各有不同乎朱子嘗言之矣但周公居
東有二自流言之行公則避而居東二年有
風雷之變而迎公以歸然後作大誥東征三
年而歸此詩則作於東征而歸之時也

傳○一章惱釋文吐刃反○說文濛微兩○士事
毛傳文非鄭氏○行戶郎反陳直刃反○箸從

竹遲據反今俗作筴繡周禮釋文胡卦胡麥二反或音卦微也。○勞去聲蓋爲之爲于僞反。○二章䟽括樓一名天瓜葉如瓜葉形兩兩相值蔓延青黑色六月華七月實如瓜瓣。○䟽鼠婦一名委黍在壁根下甕底土中生似白魚。○䟽蟪蛄一名長跖小蜘蛛長脚者俗呼爲喜子此蟲來著人衣當有親客至有喜跖音欺脚也。○詩記町疇廬傍畦壟爲麋鹿之場又曰區種法伊尹作爲區田一畝之中地長十八丈作十五町町間分十四道通人行疇爲田里所聚。○三章䟽鸛雀似鶴而大長頸赤喙白身黑尾翅又

有負釜黑尻背竈阜裙四名埤雅鸛知天將雨俯鳴則陰仰鳴則晴尻苦高反。○䟽蚘蛄大螳也小者即名螳此蟲穴處輦土爲塚以避溼蚘音毗蛄扶牛反螳宜倚反溼失入反。○詩記有陰雨之候則婦思念其勞而悲嘆蓋行者於陰雨尤苦而念之切也我征聿至謂我之行者其遂至也婦人灑掃以待夫之至顧見苦瓜繫於栗薪因感其夫久匏繫於外嘆曰自我不見于今三年矣。○四章倉庚見周南葛覃。○䟽馬色有黃處有白處曰皇有駢處有白處曰駢音留赤色也。○禕許韋反悅中也衿其鳩反繫佩

帶士昏禮母施衿結帨曰勉之敬之夙夜無違
宮事○題下思息字反望女之女音汝勞苦勞
詩之勞皆去聲鞏古勇反固也

破斧四幽軍士荅周公勞已異

經○語錄破斧詩看聖人這般心下詩人直是形
容得出這是荅東山之詩古人做事苟利國家
雖殺身為之而不辭如今人箇箇計較利害看
你四國如何不安也得不寧也得只是護了我
斨我斧莫待缺壞了又曰周公東征四國是皇
見得周公用心始得

傳○一章隋徒禾湯果二反盞曲容反義見七月

○勞已勞之之勞皆去聲被去聲○詩緝詩人
言兵器必曰弓矢干戈矛戟無專言斧斨錡鉞
者斧雖兵器所用而以斨並言乃幽民所用以
采桑者又錡為鑿屬鉞為木屬以類言之知皆
非兵器矣周公奉王命以討罪有征無戰又遲
之三年不為急攻之計未嘗從事於戰陣惟行
師有除道樵蘇之事斧斨之用為多歷時之久
則必弊故此詩言管蔡之亂何能為哉但能破
我斧缺我斨而已其兵器元無損也舊說破斧
缺斨為戰陣殺戮之多至於如此且東山序謂
一章言其完孔氏云東征無戰陣然則破斧缺

斨非為戰也周公提王師以臨小醜若用其兵
 力一鼓滅之何待三年乎觀尚書所載周公之
 化商勤拳懇惻如父兄之愛其子弟真所謂哀
 我人斯也苟殺戮之多至於破斧缺斨則是與
 之血戰而僅勝之亦疲弊甚矣故血流漂杵孟
 子所不信揮刀紛紜韓氏之陋也○語錄陳淳
 問被堅執銳疑是麤人如何謂聖人之徒曰不
 是聖人之徒便是賊徒有麤底聖人之徒亦有
 讀書識理底盜賊之徒○二三章疏鑿屬曰錡
 木屬曰鈹未見其文亦不知其狀釋文鈹一解
 云今之獨頭斧○題下間去聲

伐柯

五 豳

東人喜見周公異

經

伐柯非難事也然必須斧娶妻亦非難事也
 然必須媒東人之於周公被其風而化其德
 思慕之極瞻之固若在前也然而貴賤之殊
 道里之遠亦未易見也故其企望如此及其
 因事而東則幸而得見故喜之而如二章之
 所言也子金子舊說謂諷成王當使人通周
 公之意亦通

傳○一章疏考工記柯長三尺博三寸厚一寸有
 半五分其長以其一為之首注首六寸謂今剛

關頭斧柯其柄也疏漢時斧近刃皆以剛鐵為之又以柄關孔。二章爾雅疏豆以木為之高一尺口足徑一尺其足名鐙中央直豎者名校徑二寸黑漆飾朱中大夫以上畫以雲氣諸侯以象天子以玉皆飾其口也其實四升用薦菹醢籩以竹為之亦受四升口有藤緣形制如豆盛棗栗桃梅菱芡脯脩膾鮑糗餌之屬鐙音登菹臻魚反膾呵姑反腊也糗去久反餌仍吏反。士昏禮親迎之日初昏陳三鼎實特豚合升舉肺脊二祭肺二魚十有四兔腊一婦至布席于室中夫席在奧東向婦席西向皆設醬菹

醢載牲體魚腊于俎而設之及黍稷涪壻揖婦即對筵皆坐祭薦黍稷肺膾爾黍授肺脊皆食以涪醬祭舉食舉三飯卒食酌醕然後用鬯鼎

者升豚魚腊也特猶一也合升合左右胖升於鼎舉肺脊者食時所先舉下文凡言舉者同每皆二者夫婦各一耳涪肉汁爾移也移置席上醕以酒潔口鬯破迎魚覲反涪音泣鬯音謹此為同

牢之禮約禮經注大略言之

九罭

六東人願周公留自異

經○語錄九罭詩分明是東人願其東故致願留之意公歸豈無所於汝但暫寓信處耳公歸將不復來於汝但暫寓信宿耳是以有袞衣兮是以二字如今都不說蓋本謂緣公暫至於此是

以此間有被袞衣之人無以我公歸兮無使我
心悲兮其為東人願留之詩豈不甚明白止緣
序有刺朝廷不知之句故後之說詩者悉委曲
附會費多少辭語到底鶻突某嘗謂死後千百
年須有人知此意自看來直是盡見得聖人之
心又曰寬厚溫柔詩教也若如今人說九罭詩
乃責其君之辭何處討寬厚溫柔之意

傳○一章爾雅疏九罭謂魚之所入有九囊詩緝
毛以為小網諸家或以為大網郭璞言有百囊
網則九囊者不得為大又有不及九囊者則九
囊亦不為甚小蓋常網也○鱠音混爾雅翼鱠

魚目中赤色一道橫貫瞳魚之美者食螺蚌多
獨行見網輒避○魴見周南汝墳○雌位柚壘
三音卷音袞九章之義龍取其變山取其鎮華
蟲取其文火取其明宗廟之彝取其孝彝之所
以畫虎雌者以其義與智也藻取其潔粉米取
其養黼取其斷黻取其辨

狼跋七美周公

經○語錄狼跋其胡載憲其尾此與是反說亦有
些意義公孫碩膚如言幸虜營及北狩之意言
公之被毀非四國之流言乃公自遜此大美耳
此古人善於辭命處又曰魯昭公分明是為季

氏所逐春秋却書云公孫于齊如其自出云耳
是此意又曰狼性不能平行每行首尾一俯一
仰首至地則尾舉向上胡舉向上則尾寔至地
故曰狼跋其胡載寔其尾孫蘇困反

傳○一章寔丁四反類隔切今易陟利反○䟽跋
前行曰躡躡曰頓曰寔說文云跋躡丁千反躡
躡竹二反躡即寔也然則跋與寔皆是顛倒之
類以跋為躡者謂跋其胡而倒躡耳老狼有胡
謂頷下垂胡進則躡其胡謂躡胡而前倒也退
則躡其尾謂卻頓而倒於尾上也○詩緝狼猛
健之獸雖善用兵者禦之亦不能免平時不至

跋寔其老者雖項下垂胡若在平地亦無跋之
之理所言跋胡寔尾者謂其落機穽之時進退
求脫不能耳○躡極業反 詩記鄭氏屨人注
王鳥有三等赤鳥為上冕服之鳥詩云王錫韓
侯玄衮赤鳥則諸侯與王同複下曰鳥○又曰
八人所憑以為安故几几安也 被去聲○二
章聞音問

豳篇下周禮注田祖始耕田者謂神農也田峻古
之先教田者○禮記郊特牲天子大蜡八歲十
二月合聚萬物而索饗之也主先嗇而祭司嗇
饗農及郵表啜禽獸迎貓迎虎祭坊與水庸注

疏所祭八神先嗇一司嗇二農三郵表啜四貓
 虎五坊六水庸七昆蟲八所祭之神合聚萬物
 而索饗之但以此八神為主十二月周之正數
 建亥之月也先嗇若神農者司嗇后稷是也農
 田畷也郵表啜是田畷於井間所舍之處郵若
 郵亭屋宇處所表田畔啜謂井畔相連啜於此
 田畔相連啜之所造此郵舍田畷處焉禽獸下
 文貓虎之外但有助田除害者悉包之坊者所
 以畜水亦以鄣水庸者溝也所以受水亦以泄
 水昆蟲螟螽之屬○周禮息老物鄭氏曰萬物
 助天成歲事至此為其老而勞乃祀而老息之

蜡仕嫁反郵有周反啜知劣知衛二反坊音房
 ○鄭氏於二章下曰是謂幽風六章以介眉壽
 下曰是謂幽雅八章下曰是謂幽頌疏凡繫水
 土之風氣謂之風女心傷悲是民之風俗故知
 是幽風雅者正也王者設教以正民作酒養老
 是美政故知獲稻為酒是幽雅頌者美盛德之
 形容成功之事男女功畢無饑寒憂置酒稱慶
 是功成之事故知朋酒斯饗萬壽無疆是謂幽
 頌幽雅頌說見前
此但存舊說○劉株劣反割聚又都括反

幽詩次序

七月

幽國舊詩周公遭變居東時所陳

幽精大伐柯

東人喜見周公

狼跋

周公居東詩人美之

鷓鴣

周公居東二年而遺王

九罭

周公將歸東人願留

東山

周公東征歸而勞士

破斧

軍士答周公

十五國風一百六十詩

正風二十五詩

周南十一詩 召南十四詩

變風一百三十五詩

邶十九詩

王十詩

魏七詩

陳十詩

幽變之正七詩

鄘十詩

鄭二十一詩

唐十二詩

檜四詩

衛十詩

齊十一詩

秦十詩

曹四詩

正詩

正之正二十三

曹四詩

周南十一

秦十詩

五關雉

葛覃二十卷耳

齊十一詩

樛木

螽斯十詩 桃夭

肅十詩

變風

兔置十五

采芣

漢廣

風汝墳

麟之趾

七十四詩

五風 召南十二

十五園風

鵲巢

采芣

草蟲

采蘋

甘棠

羔羊

殷其雷

標有梅

小星

江有汜

何彼穠矣 騶虞

正之變二

召南二

行露

野有死麕

變詩

變之正七十二

邶十四

柏舟

綠衣

燕燕

日月

終風

凱風

雄雉

匏有苦葉

式微

旄丘

簡兮

泉水

北門

北風

泉水

鄘六

柏舟

定之方中

蝮蝥

相鼠

干旄

載馳

衛七

淇奥

考槃

碩人

竹竿

芄蘭

河廣

伯兮

王四

黍離

君子于役

君子陽陽

大車

鄭四

緇衣

羔裘

女曰雞鳴

出其東門

齊二

雞鳴

甫田

魏四

葛屨

汾沮洳

陟岵

伐檀

唐八

蟋蟀

山有樞

綢繆

杕杜

鴉羽

有杕之杜

葛生

采苓

秦九

駟驥

車鄰

小戎

蒹葭

終南

無衣

渭陽

陳一

權輿

衡門

檜三

素冠

羔裘

匪風

曹三

下泉

蜉蝣

鳴鳩

豳七

東山

七月

鴟鴞

破斧

伐柯

狼跋

九罭

變之變六十三

邶五

靜女

擊鼓

谷風

新臺

二子乘舟

鄘四

君子偕老

牆有茨

桑中

鶉之奔奔

衛三

氓

有狐

木瓜

王六

揚之水

中谷有蕓

兔爰

葛藟

采葛

丘中有麻

鄭十七

將仲子

叔于田

大叔于田

清人

遵大路

有女同車

山有扶蘇

蘄兮

狡童

褰裳

采芣

東門之墠

風雨

子衿

揚之水

精義 野有蔓草 齊四 溱洧 學

外信

齊九

還

著

東方之日

東方未明

南山

盧令

敝笱

載驅

猗嗟

魏三

園有桃

十畝之間

碩鼠

唐四

揚之水

椒聊

羔裘

無衣

秦一

秦黃鳥

陳九

宛丘水

東門之粉

東門之池

曹東門之楊

墓門

防有鵲巢

月出

株林之間

澤陂

檜一

隰有萋楚

曹未

南山

蓋今同車

候人

東門

東門之日

詩集傳名物鈔卷第四 後學

楊校訂

